

Per as recrear, scolar e lavurar

Discussiun davart novas fuormas da turissem

■ (anr/fa) A Nairs han perits as chattats per reflectar davart l'avegnir: Che fuormas da turissem füssan giavüschablas pella regiun Engiadina Bassa? In marcurdi saira ha gnü lö a Nairs illa saletta dal center cultural ün simposi organisà dal professor d'architectura Roger Boltshauser e seis students e studentas. Il tema d'eira «Nouvas fuormas turisticas». Da moderatuors han fat Boltshauser e l'architect Lorenzo Giuliani chi ha passantà sia infanzia e giuventüna in Engiadina'Ota. Ils giasts d'eiran ils hoteliers Kurt Baumgartner chi maina a Scuol l'Hotel Belvedere e Carlos Gross a Sent la Pensium Aldier. Ils oters giasts d'eiran l'architect e sviluppader Gian Fanzun, l'indschegner Jon Erni chi maina Mia Engiadina e Jon Peer, il president dal cusagl administrativ da l'Institut Otalpin a Fran (IOF).

Dal svilup da l'hotellaria engiadinaisa

L'architect Giuliani ha tgnü il referat input chi ha tematisà la construcziun d'hotels in Engiadina i'ls ons 1860 fin 1914 ed i'ls ons davu las guerras. «A partir da la mità dal 19avel tschientiner culla società liberala han eir ils 'normals' citadins e na plü be la nöblia cumanzà a far vacanzas, our da la cità malsana illa natüra intacta.» Uschea es nat il turissem alpin. Quel premettaiva però differentas infrastructures, «sper las colliaziuns culla viafier dovraiva eir hotels». Il prim as trattaiva dad hotels da cura. Tant a San Murezzan sco eir a Nairs sper Scuol sun gnüts fabricats i'ls ons 1860 gronds hotels da cura. «Quels hotels as rechattaivan in vicinanza da funtanas d'aua minerala, els nu faivan part dal cumün», ha dit il perit, «pür plü tard sun gnüts erets ils hotels in cumün, sco p. ex. a Samedan l'Hotel Bernina.» Ils prüms hotels pella clas-



Illa saletta dal Center d'art contemporanea Nairs han discuss moderatuors e giasts davart ils potenzials turistics da la regiun.

FOTO F. ANDRY

sa d'immez s'haja fabrichà al principi dal 20avel tschientiner. «I'ls ons davu las guerras han ils gronds hotels luxurius cuntschaints rendü inavant, oters sun gnüts transfuormats in seguondas abitaziuns o dafatta gnüts sbodats.»

«Trar a nüz plü ferm ils potenzials existents»

Ils commembers da la discussiun s'han concentrats al svilup da novas fuormas da turissem in Engiadina Bassa. Erni ha manzunà il turissem per lavurar: «La re-

giun es ideala per as retrar qua e cumbinar la lavur cul giodimaint da natüra ed infrastruttura turistica.» Perquai es nada l'idea da «terzas plazzas» da Mia Engiadina: In seis büros spordscha quella la pussibilità da lavurar cun colliaziuns ultrasveltas, grazcha a la fibra optica. Baumgartner ha manzunà il turissem per far alch dal bun a sia sandà: «Ils giasts pon far la cura i'l Bogn Engiadina a Scuol, far spassegiadas illa bella cuntrada ed ir sülla Motta Naluns, d'instà e d'inviern.» Fanzun ha manzunà cha l'Engiadina Bas-

sa haja ün turissem cun plü o main istess'occupaziun d'instà sco d'inviern, «quai es ün grond avantag. Il böt sarà d'introdüer il turissem da tuot on.» Peer ha nomnà il turissem cultural e per as scolar sco ulteriura fuorma dal turissem. Gross ha manzunà chi's pudess in Engiadina Bassa optimar amo l'amivlezza invers il giasts. Ün preschaint i'l public ha dit cha la regiun tira a nüz amo massa pac l'avantag da las 26 funtanas d'aua minerala chi sbuorflan qua, cha quai saja avantag ch'otras regiuns nu possan copchar.

Lavuors per ragiundscher quist böt sun però fingià in trais-cha. Sco cha Martina Stadler, la directura da l'organisaziun turistica, ha dit d'incuort s'esa landervia d'aspo bundant ün on a reposiziunar la fermezza turistica da la regiun cun differentas masüras. Tanter oter as voula mantgnair las büvettas e'ls inchaschs istorics, optimar l'infuormaziun davart l'aua forta e s-chaffir per famiglias, scoulas ed interessats ulteriuras sendas tematicas chi mainan pro las funtanas.

Al medem mumaint sco'ls Dis da l'aua forta

Quist'eivna han lavurà in Engiadina Bassa 18 studentas e students dal Politecnicum ETH a Turich, departamaint architettura, cun lur professor Roger Boltshauser. I'l center da l'eivna da lavur staiva il cumün da Scuol. «No ans dumandain co cha'l cumündess as sviluppar territorialmaing, che funcziuns cha las singulas fracziuns han e co chi's pudess far ün nouv plan da las differentas zonas», ha declerà Andrea Lamprecht, l'assistente da Boltshauser. El ha manzunà la collisiun da terminis culs Dis da l'aua forta chi han eir lö quist'eivna: «Ils arrandschamaints sun bainchi a l'istess mumaint es' concurrenzschan uschea ün pa, il termin per noss'eivna da seminar d'eira però fixà da l'ETH.» Las lavuors cha'ls students e las studentas fan quist'eivna e chi faran i'l prossem temp vegnan preschantadas dürant il mais settember i'l Center cultural Nairs.

Las funtanas sco spazi da viver per flora e fauna

Referat dad Yvonne Kleinlogel da la Pro Natura i'l BES

DA BENEDICT STECHER / ANR

■ Per pudair salvar las funtanas natüralas da la Svizra metta la confederaziun a disposiziun munaida per far las perscrutaziuns necessarias. Fin hoz sun restadas amo var 10 pertschient da las funtanas natüralas chi existivan plü bod. In marcurdi ha la scienziada da l'ambiant Yvonne Kleinlogel referi aint il local da cultura dal BES a Scuol davart las funtanas natüralas e lur perscrutaziuns. Il referat ha gnü lö in connex cun l'Eivna da l'aua forta» sco

ün da divers oters evenimaints. Funtanas sun misteriusas ed inmatschadas. «L'ös ingio chi sbuorfla aua püra our da la terra han adüna fingià attrat als umans impustüt per stüder la said. Funtanas sun eir spazi da viver per bes-chas e plantas specificas», ha dit Kleinlogel. Pervi d'inchaschamaints sun svanidas cun ir dal temp fich bieras funtanas natüralas e pervi dad imprudenza sun las funtanas chi sun restadas in privel.

Funtanas natüralas as chattaiva plü bod in grond numer. Ma fingià d'aspo tschientiners dad ons ha l'uman cumanzà a dovrar quellas per avair aua da baiver. «Bieras funtanas in Grischun sun svanidas causa chi sun gnüdas spalüdas, missas a süt obain inchaschadas per aua da baiver pel muvel, per prümarans ed alps.

Tras il cresch da la populaziun s'haja eir dovrà adüna dapläs'aua.» Amo hoz svanischan diversas funtanas natüralas sainza chi's piglia resguard al spazi da viver per bes-chas e plantas. Restadas sun fin hoz tenor la referenta amo var 10 pertschient da las funtanas natüralas d'üna jada.

Provar da salvar las funtanas restantas

Perits han lura badà chi svanischan adüna dapläs'aua chi vivan aint o in vicinanza da l'aua e cha quai ha da chefar cul fat chi dà adüna plü pacas funtanas natüralas. «Perquai s'haja cumanzà a tscherchar e perscrutar funtanas ed a tillas localisar e notar quellas sün chartas geograficas.» Ils criteris per far quella lavur sun: Ingio daja amo funtanas natüralas, in che situaziun e stadi sun quellas e che bes-chas e plantas vivan da quellas? «Perquai provain no dad eruir ingio chi

pudess dar funtanas, no marcain quellas in üna charta geografica, tillas tscherchain, perscrutain e fotografain. No dumandain eir a glieud dal lö e chattaun tschertas indicaziuns in documainta veglia.» Eir ils politikkers han fat surasèn chi's tratta d'üna problematica actuala e perquai ha l'Uffizi federal per l'ambiant deliberà munaida per provar da salvar las funtanas restantas.

Funtanas ün'oasa per bes-chas e plantas


Funtanas fuorman ün spazi da viver chi's disferenzschescha dad auas, flüms o lais. L'aua chi sbuorfla our da la terra ha pac oxigen e paca substanza nudritiva ed üna temperatura constanta. Illas funtanas as chatta bieras differentas bes-chas e plantas. Quellas pon be viver in lös bletschs e nun han ün'otra pussibilità da surviver. «Perquai esa evidaint cha var 70 pertschient da quellas bes-chas sun periclitadas», ha dit Kleinlogel, «i's tratta tanter oter da larvas, giambers, ruos-chs, divers scarafags, coquiglias, lindornas ed otras, in tuot üna tschientina da spezchas.» Implü ha ella manzunà eir plantas sco creschun da funtana, grassetta, erba d'or, vaischla d'chavra, cardamina, müs-chel e bieras otras plü. «Perquai esa important d'annunzchar funtanas natüralas, da na dannaggiar las surfatschas da funtanas cun maschinas e d'avair pisser da las ultimas funtanas natüralas.» Il referat es gnü organisà da la Pro Natura.

Dumondas o eir annunzchas da funtanas natüralas as poja far pro la Pro Natura dal Grischun, Ottostrasse 25, 7000 Cuoir obain sülla pagina d'internet www.pronatura-gr.ch



Yvonne Kleinlogel da la Pro Natura ha referi a Scuol.

FOTO B. STECHER



Funtanas as chatta in differentas fuormas illa natüra.

MAD